

四庫全書

集部

欽定四庫全書

集部
漫塘集卷一

詳校官庶吉士臣翁樹培

主事臣呂雲棟覆勘

總校官原任中允臣王燕緒

校對官助教臣蔡鎮

謄錄貢生臣朱鎮

欽定四庫全書

集部四

漫塘文集

別集類三 宋

提要

臣等謹案漫塘文集三十六卷宋劉宰撰宰字平國金壇人紹熙元年進士官至浙東倉司幹官屬韓侂胄用兵挑釁宰不樂仕進尋自引去屏居漫塘三十年屢召不出以直顯謨閣主管玉局觀卒于家朝廷嘉其節賜謚

文清事蹟具宋史本傳宰著作甚多淳祐初
王遂哀其遺稿十僅得四五為之編訂名曰
前集理宗收入秘閣世遂無傳明正德間大
學士靳貴從閣中抄出因授王梟鉞梓為三
十六卷宰秉性恬澹平生無他嗜好於書靡
所不讀雖博考訓註而自得之處為多所為
文章淳古質直不事藻飾而自然明達漫塘
一賦尤為世所傳誦其講學一以程朱為歸

當為真州司法時方禁仕者讀周程氏書宰
堅不肯署狀所與遊者多朱子門人而不及
登朱子之門故集中三致意焉亦可見其趨
向之堅篤矣宰所著別有語錄十卷今已久
佚惟此集僅存云乾隆四十二年十月恭校
上

總纂官臣紀昀臣陸錫熊臣孫士毅

總校官臣陸費墀

--	--	--	--	--	--	--	--

欽定四庫全書

漫塘集卷二

宋 劉宰 撰

賦

漫塘賦

張端衡謂漫塘叟曰余昨宦東州客有問漫塘之景者余無以應或又有徵圖於余者曰子漫塘里中人也寧無之余又謝無有既歸將與好事者謀之而游乎塘之上見景物之無奇游觀之無所難之可若何

叟不對退而援筆為之賦其辭曰

東沿柳巷北屆蔬畦小溝環其南通川漫其西靡種靡

藝不穫不治

平聲

葭蘆茁而映帶成行沙土潰而壅底為

堤茶蓼叢生蒲稗因依菡萏紅白錯如布棋爛乎若吳

陂初按於彩陳

去聲

梁兮若月宮更下於瑤池翠蓋亭亭

芳氣菲菲鷺慣圓沙之宿魚便密藻之依蛙蚓爭鳴而

鼓吹百萬鴛鴻來下而爛斑舞衣雲斷而霞散錦綺風

平而月漾玻瓈茲寔天壤之真趣有非世俗之可知亦

有新齋臨乎水涯小橋斜徑矮屋疏籬雨未多而泥沒
膝門雖設而草侵扉朽木慣宰予之晝寢青苔驚玉川
之夜歸仙舟自去誰為元禮高軒不來孰為退之叟之
辭未畢端衡曰止余聞李愿安盤谷之居杜老喜浣花
之寓彼豈玩志於物縱心佚豫蓋以厭俗喧卑脫身遐
舉要必有偉麗之觀幽閒之趣以澡雪其精神澄清其
志慮庶白日可到於羲皇而宵夢足通於帝所况如吾
子內絕意於聲色外忘懷於主組為計已決厯年已屢

而是塘也廣深雖愧蘇夫子之滄浪而僻遠亦殊柳先生之鉅罍其隘也可闢其闕也可補胡不增其高而為基夷其平而為圃畫舫浮深修梁跨阻嘉花美木之列植真館涼臺之接廡使鄰曲改觀兒童欣舞顧乃計失於因循事仍於莽鹵豈惟無以自適於一時抑恐因之貽笑於千古漫塘叟曰吁巢居知風穴處識雨顧吾與子雖同聲氣尚殊出處子寧規我以目前之苟且毋寧怵我以方來之謗譽彼花迷金谷之園雪冷袁宏之渚

淒涼釣瀨富哉郿塢試由今而視昔果孰去而孰取張
子由是俛然而思釋然而悟曰子無俟於索言吾特從
而戲汝

楚辭

昭君曲

讀鄭虞任所賦及石湖諸賢題卷昭君
事反復畧盡管見容有未合漫書卷尾

朝日曜兮春花玉壺炯兮清冰耿余心兮不欺付妍醜
兮丹青君王兮宵衣壯士悲歌兮戰死豈余身兮憚殃
抗風沙兮萬里崔嵬兮增城璀璨兮昭陽羌末路兮多

艱幸朕時之不當趨裘兮娛嬉宮廬兮容與怨羣胡兮
我欺諗九天兮誰許南風兮徐來掩涕兮無語四十五
十兮無家抑有慙兮夢女

和樓倅宗簿

昉

某病不可仕歸老漁樵郡通守樓宗簿好古樂善
意其違世獨立似古隱者歌楚詞以遺之辭嚴義
正足與屈宋並驅友人王仲永料院復用韻見寄
見黃門而稱貞雖不能不為知言之累然厚意不

可孤也謹次韻以謝前以自見後以見區區之望
云

草莽莽兮平臺鳥翩翩兮去來側身兮引睇長太息兮
徘徊攬余轡兮高驚豈不夙夜兮謂行多露漱流泉兮
枕石憺無營兮得我所同心兮離居未傾蓋兮有書歲
既晏兮無娛我思君兮君開闕而望余

其二

余幼好此奇服兮歲荏苒而華顛聞若人之好修兮蹇

衆芳而獨專結微情以陳詞兮鱗鴻杳以無傳惟聖哲
之茂行兮在舉能而任賢橫江湖以揚舫兮寧維楫之
可捐爛晨光兮破羣幽清風發兮涼氣颼颼瓊珮兮鏘
鏘玉鸞鳴兮啾啾時不可兮驟得君胡為乎此留

月桂辭送陳兄部運京口

芳菲菲兮月之桂子之家兮傳芳世世月之桂兮古猶
今往則得兮子寧不嗣音冠鵷冠兮謝章甫司征商兮
河之澌更兼官兮部運幸訖事兮無忤歸來兮歸來倚

門悵望兮高堂慈母

書竇文卿墓

棟宇兮煌煌鬢髮兮蒼蒼羌一言兮會心駕吾車兮建
陽車既駕兮遄歸今良是兮昨非釋衆累兮春冰耿吾
心兮夕暉斯道兮孔壽斯人兮不忘十載兮重來沲寥
兮此堂風撼兮寒松霜凋兮百草佳城兮葱葱萬古兮
是保

五言絕句

雲邊種松

雲邊先隴菴名

漸止牛羊牧還添雨露滋但令萌蘖長自有歲寒姿

題屏間

野曠乾坤大身閒日月遲有生均自得造物本無私

謝陳僉惠紅綠柿

紅綠分佳果丹青讓好辭遙憐霜落葉岸幘坐題詩

送李季允侍郎歸蜀五絕用禪房花竹幽為韻

密葉秋逾潤幽花晚更妍去來誰是主試問白頭禪

地僻風煙好身閒日月長未知嘉遯吉占驗笑京房
淮海身如繫岷峨路去賒相思冰雪裏卻立嗅梅花
交情契金蘭燕樂非絲竹我歌古別離語盡君當續
日脚收新雨禪房早得秋重來應更好誰與共清幽
送昔監稅滿替

但了官中事都無俸外錢妙年能爾爾晚節更須堅
題虎丘劔池

石壁千年立池泉百尺深蕭蕭陵下木遺恨古猶今

題王氏天開圖畫卷後

濃淡非粧點縱橫謝剪裁憑欄一凝睇圖畫信天開

次王兄韻二首

錦繡胷中富珠璣筆下生如何鹿門去不向玉堂盛

買屋依三阜開窻對兩池去來誰是主空鎖壁間詩

潑墨

池庵前有兩池號海眼旁皆流水為三
茅勝處某本得之既為好事者所取云

再用韻

野徑梅初發寒塘草又生能來同社酒莫笑瓦盆盛

綠楊陶令宅芳草謝家池
開徑應須我酬君未有詩

雲邊遣興

穴處堪忘世松餐足永年
有時雲雨止獨立看青天

送李果州

道傳以人生
五馬貴為韻

蕭然瘦鶴姿不受世俗塵
吾衰久矣夫眼明見斯人
含香趨漢陛前席問賈生
要路須民庸錦衣聊畫行
一年春好處寒食一百五
想見東晨裝沙頭震鼉鼓

昔吾有先正走卒稱司馬
憂國等憂家人物君其亞

貴字
韻闕

七言絕句

儀真法曹日作

紛紛惡直喜阿諛
局束英豪氣不舒
萬事付渠三昧手
此生自放五車書

題儀真常平倉壁

苦被微官縛此身
汗衣亭午亞紅塵
維舟醉卧垂楊下
輸與江湖自在人

儀真呈隣居同官

南樓風物怯新晴
管領心知獨有君
從使市聲塵午枕
不妨清夢到行雲

過尤溪

尤溪塘上征人路
記得停驂一解顏
十載重來兒女換
似曾相識有青山

過剡溪

青山疊疊水潺潺
路轉峯回又一灣
想見雪天無限好
不妨獨棹酒船還

賦陳太史所築凌雲亭四首

太史曾題仲舉與子虛賦就壓蓬廬終然不負凌雲志
會向蓬萊頂上居

吏退庭空一逕深交柯密葉布繁陰婆娑誰識先生意
恐負當時庇物心

紫煙縹緲接雲霞亭下連甍十萬家想見當年關尹子
已占柱史入京華

身自蓬萊頂上來彩雲深處見崔嵬憑高莫作凌雲想

聞說天門有詔催

題馮公嶺旅邸

層樓傑閣聳朱欄樓下行人自往還但見彩雲橫木末
不知身在翠微間

題永嘉寺壁

石泉飛下寶蓮宮似聽鈞天奏未終千古風流謝康樂
可無屐齒此山中

題石門奉真觀

疊障為屏石作門陰雲漠漠雨昏昏清游到晚不知去
要上峯頭望曉暎

吳門道中

三吳豪俠騁輕肥盡是當年襁褓兒鬢髮蒼蒼顏色改
問翁如此復何為

舟過惠山

小立船頭看惠山山尖半在有無間蠶眠未老秧方綠
且放煙雲自往還

舟中

蓼岸著花紅半吐
稻畦過雨綠平鋪
炊煙起處三家市
却向江湖憶畫圖

醉中

一樽綠酒與君同
且喜荷香送晚風
四座盡傾談柄白
滿筵不用舞裙紅

漫塘口占

醉著船頭背月眠
醒來紅日浴晴川
等閒活計無人共

獨占江湖萬里天

九日

擣養窮酒薦新春嘆息年來甌石空不惜解衣供一餉
要令稚子識家風

感春

隔溪啼鳥弄新音繞岸蒲芽迸綠簪花事只今強半在
不妨風雨攪春陰

七夕

天孫今夕渡銀潢女伴紛紛乞巧忙
乞得巧多成底事祇堪裝點嫁衣裳

天台道中用陳氏園亭韻

筍輿穿過萬重山邂逅登亭一解顏
剩欲題詩徧蒼石舉頭羞見嶺雲間

再用韻

亭俯澄波對碧山山頭古木總蒼顏
愛山未辦還山計猿鶴還應伴我閒

秋懷二首

翠幄迎霜半染紅
高林風過雜笙鐘
澄光萬頃天無滓
留與羲和駕六龍

一抹紅綃日脚霞
千林暮靄納歸鴉
西風捲盡梧桐葉
乞與中庭散月華

去聲

嘲啼鳥 脫却破袴

破袴年來未改為
園中啼鳥汝何知
從教解使君侯悟
爾死何由得蓋帷

東陽道中聞杜鵑

萬里雲山路渺茫
車輪竟日往來忙
憑君一語成歸去
笑殺兒時射四方

聞桔槔

歲旱田家競作勞
車聲夜半響嗷嘈
市門多少夸毗子
日晏高眠笑爾曹

宿直里店二首

扁舟泛泛逐驚湍
朔吹颼颼作曉寒
艤棹遠來投野店

應門幸喜得儒冠

稻穫田空宿水禽
去來終夜有清音
投床倦客無他想
祇入聲有江湖萬里心

雷發散雨書懷

轟雷驚散半空雨
赫日衝開萬里雲
依舊炎炎還酷暑
南來猶幸有晴薰

題呂城廟

呂公遺壘枕高岡
落日西風草木荒
王氣懸知南國在

不妨北面儼冠裳

和陳倅校書惠詩

故交袞袞白頭新
傾蓋相望有幾人
奉詔君應歸冊府
一蓑我欲老江濱

和陳校書祈雨有應

一念憂民敢憚煩
肩輿得得款祠壇
莫嫌勺水能多少
自是壺中世界寬

和陳校書生孫

四海聲名陳太丘元方有子復何憂他年羔鴈成羣至
不獨丹青詫豫州

和趙季行用蘭花韻三首

破除百卉發孤芳造化工夫有抑揚平易堂中無箇事
一枝相對吐清香

結根崑谷謝羣芳多謝光風為發揚騷客毋煩賦紉佩
省郎行矣趣含香

鷓鴣潛消百草芳清芬散逐楚風揚洛陽姚魏空增價

愧死嵒隈有國香

次韻蘇明仲

詩翁名字簡思陵死去人疑化鶴丁敗絮當年猶自擁
褐衣今日可忘情

酬陳子與

門外秋光入句頻門前積雨少來人利名到底成何事
贏得江湖自在身

送晦庵語孟集註與諸姪

伊洛遺書徧討論微言千古破童昏要知此老殷勤意
送與君家好弟兄

冬日即事

飛廉不解却豐隆結就濃陰萬里同須信碧霄無點滓
曉來紅日自生東

戲和荊公讀漢書

當年泚筆笑愚忠後日私書迹更窮自是京劉異恭顯
未知君意與誰同

讀韓詩和其韻

詩有二句云力去陳言誇末俗可憐無補費精神

韓子文同孟氏醇陳言去盡只天真君詩費却雕鐫力
筆下應誇自有神

讀蘓武傳

李陵衛律兩降人大義相規幾盡誠陵語不傳傳衛律
要令千載識交情

讀公孫弘卜式兒寬傳

儒雅弘寬世所宗汗青中介牧羊翁史家有意君知否

未必文華勝樸忠

讀樓護傳

劉氏難令呂氏安
酈生大義炳如丹
君卿賣友阿王莽
死去何顏見呂寬

讀衛青傳

任俠行權世所誅
將軍尚借齒牙餘
古來名將勤招選
底事牢辭不敢居

書陳少陽遺墨後

贖死何由可百身遺書猶足警來人當時珍重千金字
此日淒涼一窖塵

送應徵之歸天台

去來行李苦匆匆世路崎嶇一笑中聞道倚門占鵲喜
早尋歸棹浙江東

借明秀軒韻送趙推入幕二首

七澤波濤筆下吞相逢曉日上天門祇入聲今出處難同

調慙愧高軒幾訪存

紛紛末俗假成真幕府歸來歲聿新萬里終存江海志
一毫莫染簿書塵

雲邊即事

山鳥紛紛不計名曉來眈眈弄新晴山人不識虞庭樂
疑是簫韶奏九成

題龍祠米元暉詞後

以有改勝尋
為尋勝者作

醉筆淋漓紀勝尋重來尚想百年心浪將一字殊先後
誰識朱弦太古音

松影

老松偃蹇印晴空
倒影參差澹月中
夜久無人共清賞
一庭蕭瑟走虬龍

戲傳老

時在慈雲寺設糜

錦繡囊開一夜風
萬家花柳鬬青紅
誰知一點陽和氣
盡在高禪杖錫中

謝薦賢

容貌天黥二十年
剗腸一洗悵無緣
祇今縱使逢醫緩

金匱要略卷之八
却顧霜毛已颯然

雲邊阻雨

輾轉無眠到夜闌
鵲聲送喜近簷間
好風吹斷夜來雨
晴日放開雲外山

又用前韻

薔薇籬落送春闌
筍甚園林早夏間
牛背牧兒酣午夢
不知風雨過前山

酬傅老

人生不見古無懷
平陸猶成灝瀕堆
百歲髑髏能發語
有生非樂死非災

題布金寺鐘樓

雲間縹緲出層樓
樓上鐘成四百秋
當日繁華今不見
鐘聲依舊滿林丘

黃梅

林梢脆實薦辛酸
尚記兒時刮目看
老去齒牙無復昔
曉枝猶喜墮金丸

題張端衡竹木石畫

槎牙高樹蕭梢竹絕島風煙開短軸更煩點筆作衰翁
嘯月吟風飲山祿

送張端質上春官

第一江山酒兩壺送君鼓篋入皇都直須第一收名第
莫使江山擅美呼

送劉簿秩滿東歸

一官簿領十年間此去青雲手可攀勝日西湖浮畫舫

頻將卮酒酌孤山

謝趙使君豁租

長榜朱書又墨書使君頒令豁逃租
一千里內歡聲滿
十數年來此事無

送茅監

一棹東來載月歸宦途此去有光輝
祖筵是處花枝裊
慙愧衰翁晝掩扉

寄潘子善上舍

寂寞安居十載餘
高軒欲過尚躊躇
莫嫌窮巷青泥滿
自是門多長者車

代東寄王去非

聞隨使節過江東
想見旌旗十里紅
多少蒼生在寒谷
早吹鄒律轉春風

寄江東真漕

德秀

金陵千古帝王都
肉食何人解遠圖
只有愛民真學士
不慙通務漢三儒

簡同志

竹韻因風來滿楹
桂枝和月印中庭
遙知棊罷渾無事
百首新詩醉復醒

謝紀倅惠梅

翠實堆盤對綠樽
清香尚想月黃昏
主人合試調羹手
病叟難忘止渴恩

口占謝陳使君

相思目斷鑑湖船
書別殷勤敢贈言
未解終南尋捷徑

少寬谷口截朱轅

書蔣雲巢詩卷後

逸興常同造物游
駕巢不與世人侔
日晴紫翠開千嶂
依舊君家在上頭

雲邊遣興

洩雲日日冒山頭
古澗淙淙咽怒流
但得農家餘雨澤
不妨客子嘆淹留

乙酉夏述懷二絕

水邊舟子競招招陌上車塵晚更颺祇有幽人無箇事
藕花深處弄輕橈

岸柳風摧更綠饒檻花當暑自紅嬌流行一氣元無息
松柏何妨獨後彫

答王去非覓柳栽

不惜柔條折贈君與君分占萬家春祇愁五柳門前景
不稱三槐堂裏人

得軒即事

上印還家不計年水光彌望木參天綠雲洞裏

嘗名漫塘上為

綠雲洞天

開書幌紅錦波心漾酒船

荷花

淤泥除盡藕根空留得孤芳照病翁水面亭亭塵不染
懸知不是蓼花紅

和錢晉之綠雲洞天韻

理亂幽人了不聞扶疎遶舍綠成雲洞中不異人間世
一枕邯鄲浪策勲

答鍾元達覓藕栽二首

紅粧翠蓋出污塗
水面風吹醉欲扶
自是凌波有仙種
文君莫訝茂陵姝

漸點青錢浮水面
猶將素節混泥沙
送君百頃風潭上
莫笑原非十丈花

戲謝張端衡惠牡丹并湯鵝

右軍

俚語謂鵝

渾脫從花王
老子開盤喜欲狂
擬插一枝無

稱面浪餐鵝炙愧劉郎

題瀑布畫

洩雲瀕洞遮山腹古木搓牙繚山足
舉頭百丈瀉寒泉
知有高峯挿天綠

題德源庵

祖墳所在因做社倉以惠村民

牖戶綢繆實父基豆區積貯訓承師
老來事業僅如此
慙愧平生祇入小知

回陳兄惠瓜

碧圓到眼舌生津三載深慙拜賜頻
莫怪尊前最知味

東陵自是種瓜人

奉酬陳居士

高人不作飯牛歌
盍嚮滄浪具笠蓑
正使同舟欠西子
也勝逐日效秦娥

用韻索青娥丸

病餘不賦惱儂歌
活計江湖一釣蓑
儻許膏肓驅二豎
肯令紅粉污青娥

代東蘇僉

七十收身古戰場歸來八十更康強酒闌庭戶秋光好
想見詩成一縷香

東張簿二首

簿書閱過幾牛腰一縷清香午未消
梔室醉吟誰是伴
鐵城折簡可頻招

細肋朝來正割鮮瓦瓶先臘湛寒泉
香棲枳棘寧多日
斷送橫飛上九天

代東促陳居士歸

一棹東遊久未歸
羞囊應已典春衣
淡煙疎柳鱸魚市
底事流涎對落暉

代東答徐監押

隋堤綠柳漾清流
畫舸輸君爛漫遊
柘蕩高湖須老伴
不妨捩柁出灣頭

口占送紙鶴帳與王克家中書

壁

雪銅丹頂更玄裳
持赴君家六尺牀
午枕不須蠻素問
主人心地正清涼

和王克家所寄草堂詩二首

絃歌流化記琴堂
椎魯難言愧互鄉
正對薇花揮翰墨
猶能春草夢池塘

身在金華與玉堂
寄聲時到祝雞鄉
為言舊訪盧仝處
柳壓平堤水滿塘

次韻謝范黃中運管炎二絕

一區聞道宅新成
蕭灑真堪寄此生
曾次清冰元自瑩
不妨更向玉壺盛

刁塢春回花滿枝
沈溪夢斷水盈池
遙知弔古經行處
落紙雲烟總是詩

題恭靖兄志庵二首

宅兆當從志所安
故山松竹舞林巒
莫嗟外有封疆隔
亡姪欲求鄰壤未得之自覺中含宇宙寬

山勢西來如鳳舞
林巒左轉若龍蟠
門前一水流新綠
須信神心萬古安

題明倫堂

六杉中一桂

六樹庭前過屋山一枝仙桂許高攀

俗說如此

風雲有幸逢

千載里社應先庇萬間

送徐兄封川之行

別時觸目是愁端適喜君懷宇宙寬
千里事人猶見喜寄聲別駕好相看

聞杜鵑三首

舊於東陽道中聞杜鵑啼曾題壁間一絕
鄉邑無此鳥近頗有之因作三絕其一用舊韻以解前詩之大

言無實云時紹定己丑春

當日停輶古道傍
大言聊以解愁腸
只今老去還吳下
無復驅車走四方

天津橋上小徘徊
入耳新聲兆有開
家住江南異京洛
不因君至浪驚猜

薄宦思歸畏嶮巇
從君歸去苦嫌遲
歸時綠鬢今黃髮
歸路平安我獨知

送洪季揚

揚祖

分教橫州兼呈丁帥二首

仕有為貧難擇地志將及物要乘時青衫入手南中去
此意惟應我輩知

五百人中占上游四千里外客諸侯南中賴有賢方伯
處我應須勝自謀

送機僧代東莊氏

長蕩湖南好事家祇今無復舊豪華斗升為乞西江水
涸鮒餘生或有涯

送丁道士住洞陽

華陽洞口鍊丹臺仙客遺基在草萊急遣羽流專洒掃
千年去鶴會歸來

九日送酒黃竹礪

老瓦盆中淥酒香田家風物近重陽不知竹礪槃桓處
今賦黃華第幾章

寄題洪氏永則軒

此則天然與性俱執柯何必遠求歟父兄行已一家法
聖哲傳心萬卷書

為紀生借屋

乃祖焚身為祖劉末孫那敢不相周單辭往扣賢公子
茅屋何妨得借留

送上元張尉兼東呂制幹二首

千古繁華白下亭萬家花柳擁層城登臨此去非無地
彈壓中間要有聲

幕府東來第一人姓名星斗揭蒼旻龍駒要踏浮雲去
好向庭前一問津

枕上四首呈丁景舒

時景舒句
容罷歸

督郵行縣豈徒哉指點虛無作禍媒
料得淵明知此意懸拋印綬賦歸來

弦歌容與倦將迎五斗看來一羽輕
若也兒曹知此意可容千載擅清名

籬邊把菊玩遺芳未肯從渠入醉鄉
五字句中窺屈宋七絃聲裏到羲皇

等閒遊目送飛鴻適意何妨酒一中
蓮社未應尋盛遠

竹林中亦著濤戎

代東謝袁兄

漁樵並舍兩相忘
三逕回看久就荒
只有生平真活計
湖光萬頃接山光

送無灰酒周馬帥口占三絕

寶璽來歸萬國春
海隅花鳥亦欣欣
皇恩更向將軍厚

乞去聲與人間自在身惜用

乞得閒身荷聖朝
舊棲佳處日逍遙
却憐赤壁歸來日

歌舞樽前祇小喬

奉寄無灰酒十罌一盃入藥可長生藥成預約分酬我
眉壽相期比老彭

奉酬敬亭石隱君

宛陵佳處敬亭山中有臞仙獨自閒
賸喜好音來物外
莫令佳句到人間

為土山行者勸緣

莫言山勢但陂陀坐斷東南萬頃波
地勝要人勤洒掃

瓶空無米却如何

送珪老住普照

結屋緣崖地苦慳
嘉名猶記壽丘山
萬家不隔高人眼
日月東西見往還

贈沈術士號金腰帶

萬釘寶帶誠堪羨
七字成詩喜欲狂
世事浮華有真趣
贈君一笑作行囊

湯參議惠蓮走筆以謝

時雨姪
分爭

蓮實同房若弟昆人情乖異不堪論只今昆弟成胡越
蔓草猶能庇本根

走筆送韓昕伯謁任廣文

芹宮競說廣文賢姓字高懸衮繡邊八十老翁無失德
三千弟子盡推先

題明秀軒

時趙虞卿新修

波搖山綠浸雲根山壓波回不受吞鏡面平開三萬頃
當軒管領屬王孫

和劉聖與顧龍山探梅四首

玉骨冰肌淑且真只應姑射可為隣
東風次第吹桃李輸與儂家第一春

暗裏曹劉可識真意行不必問比隣
天涯望斷無來使占取山中自在春

山行未愜此情真問訊寒梅到比隣
但有疎花印寒月不妨自是一家春

費盡鉛華總失真色香清絕兩無隣
待渠經始和羹了

乞與無邊草木春

去聲

甲午秋作四絕題窻間

驛吏持來郡吏批
丁寧急急趁符移
兒童駭汗催科急
趣駕元來荷聖慈

明時一士不遐遺
臣子無才盍自知
騎馬趨朝常處士
幾人笑誦醉翁詩

漆園逸氣貌雲霄
吏部英詞揭斗杓
未用雞蟲分得失
笑看鵬鷃兩逍遙

聯翩銜尾下深溪又是當年竭澤時
玉燭均調何日是
春陵三歎次山詩

贈凌山人二首

星冠鶴氅臚威儀
新納官錢得度歸
慙愧三茅老兄弟
一生木石草為衣

百鍊靈丹手製成
等閒騎鶴上青冥
縑山自有來時侶

莫羨遼東化鶴丁

凌本李居士弟子
今師丁道士故云

贈齒醫魯生

曾過當湖好事家園池髣髴記豪華老來只欲甘藜藿
乞去聲我仙方固齒牙

次李秀崑鶴溪四詩韻

淒淒寒日漾溪流獵獵西風送客舟
勇退端為天下計
留行誰為聖王謀

忠謀衮衮要須殫幾度敷陳古本乾
夜半會思前席對
天遙毋使此心闌

少年意氣十分強河廣期憑一葦航
老去結廬漁舍畔

笑看鳬雁往來忙

稻粱初熟社醅香
草草盃盤不著行
別後書來煩記取
綠楊堤畔水盈塘

賀真參政因以為戒

名賢得位古來難
君有高名宇宙間
願率衆星環北極
要令百世仰西山

聞田老死于臨安

見說眉龐質粹溫
他年準擬大吾門
可憐不識家翁面

虛作人間一世孫

送鄭節夫

盛年已去壯心闌
此別懸知後會難
願使乾坤同日月
不妨閩浙異江山

東西岡諸李謀復宏詞墓

前朝流派日星明
聖代殊科更策名
遺骨未寒丘壟廢
可能宗黨不關情

書湯兄詩卷後并呈丹陽大夫三首

明月韶光麗社湖發揮千載賴耆儒清江曲就無人識
來往橫塘一鄙夫

令尹宵襟隘五湖狂言時肯聽迂儒未知他日翹材館
可著當年鄭介夫

長安未必勝江湖蓋世功名俟大儒三事更應登密令
一廬我欲伴樵夫

走筆謝王老丈惠花牋

璀璨金魚學士牋玉堂落筆起雲煙半生野外扶犁手

乞去聲與真如擲道邊

題子登姪環綠齋

竹樹回環一畝宮
紅塵不到綠陰濃
堆前祇入聲有書千卷
善後懸知祿萬鍾


題槃齋

不到槃齋十一年
舊時梧柳已參天
應乘天上浮雲去
忍看梁間淡月篇

題劉文簡所藏墨梅卷

煙雨和成宛擅場新來翻著雪衣裳以吾不可學渠可
善學楊君祗此郎

楊補之甥湯君所畫自謂得補之白
黑相形法此卷乃為倒暈素質以反



漫塘集卷一

欽定四庫全書

集部
漫塘集卷二

詳校官庶吉士臣翁樹培

主事臣呂雲棟覆勘

總校官原任中允臣王燕緒

校對官助教臣蔡鎮

謄錄貢生臣朱鎮

欽定四庫全書

漫塘集卷二

宋 劉宰 撰

五言八句

雲邊偶成二首

月下浮舟去雲邊曳杖行
物華隨節換人意與秋清小
圃蔬逾潤荒叢菊向榮
幽尋元自好底用絆浮名

地曠晚逾靜山空月倍明
銀河橫灝氣石澗伴吟聲
颺颺迎風葉飛飛濕露螢
歲華行晚矣為爾一凝情

發紹興

留滯青春晚經行此日初柔條桑著眼短穗麥生鬚竹
外雲埋屋花邊水遶渠箇中容我老肯遺子公書

天台道中

花重朝霏散鳥啼春意深風光自流轉行役負登臨澗
水流新綠山雲捲夕陰病容兼白鬢漂泊此時心

馮公嶺

地隘山逾峻人勤俗不奢時培石上土更種竹間茶接

畛田成篆連筒水濺花征塵如不到老我即東家

長林場海邊道上

海霧晚逾合海風春更寒衰顏欺薄酒老膽傲驚湍叢
竹人家近平沙客路寬明朝應更好山翠撲征鞍

松江道中

久作松江夢重來泛短篷淡雲飛急雪枯葉戰狂風煙
末三家市波心一釣翁鷗夷身計耳吳越等成空

同葉恭叔鄭節卿飲于趙子野官舍

分得
壺字

相望各千里相逢酒一壺交情貫金石詩思渺江湖夜
雨滋園菊秋風落井梧歸與吾有日聚散一長吁

偶成

木落山呈骨泉空水反源知時秋燕去負日午蜂喧玉
粒炊晨甑金英卧晚園歲華今已暮身世兩忘言

試郭生筆

金華山中僊委蛇霜雪明君於何處得束縛封管城大
白真若尋脫帽甘沉冥世有揚子雲猶堪草玄經

送傅守伯成歸

以林園窮勝事鐘鼓樂清時為韻

煩暑斂清曉西風生遠林
客懷感素秋歸夢越千岑
祖帳城南門藹藹萃華簪
舉觴忽有贈去矣無遐心

堂堂司馬公獨樂五畝園
歲月坐成晚花木亦已繁
世事尚可為石交有遺言
歸來默無語拊石弄潺湲

令行肅權豪仁施先困窮
適此饑饉餘喟彼杼軸空
勞來窮人謀祈禳與天通
那得三百州落落皆此公

世念分五兵當使道戰勝
昔別稽山陰風采耀而整
重

逢驚少壯神光燦衰病一氣中夜存還丹唾葛令

永日來清風黃堂少公事憑欄一長望千載幾興廢論
功赤壁多語士北府銳歸舟眇家具弔古足新製

金山故佳麗傑觀環孤峯對峙焦公廬林杪出疎鐘南
歸謝塵鞅北眺足從容應持濟川手一盃擊楫翁

辯士變初說勇士衰再鼓向來東海濱有士節獨苦歲
晚兒女戀頗亦類張禹堂堂裴晉公綠野能容與

仕至二千石富貴有足樂官為諫大夫亦足究所學蘭

階擢珠樹金閨聯棟等何妨赤松遊不負黃石約
濯纓滄浪水為愛滄浪清明明中興主齋居方厲精疏
傳不自惜決去鴻毛輕濫觴爾何知咄哉檀長卿
北渚有狂士病卧忘四時綠暗知春晚葉落識秋期西
風日已高凝露方自滋獨有歲寒心不負流水知

送梁伯暘歸括蒼三首

怒風駕海潮錢塘天下壯岷山浚源委東下極奔放中
橫吳淞江煙波渺四望歸與太史筆偃蹇九霄上

城關美少年三五事游冶明璫燭綺疏寶香籠舞榭一
朝黃金盡帷蓋羞狗馬短檠有真樂行矣遶取舍

西北天馬駒墮地志千里暴生執鞭轡邂逅渥洼水東
來薦郊廟聲名藹千祀吐爾駑駘輩局縮當愧死

雲邊偶成

樂歲饒嘉澤荒山徧有秋斷雲猶過雨平陸自交流香
飯炊紅軟嘉蔬薦綠柔蠅營竟何事老我即菟裘

即事有懷二首

千山收宿靄一氣藹金行爽吹舒澄碧晴暉麗太清徘徊望前巔徙倚步南榮為問尊鱸客何須身後名濟世無長策觀詩歎小明悠悠忘夜永淅淅聽秋聲困躋鹽車驥飛騰腐草螢乖逢偶然爾造物兩何情

儀真雍生見和因再用韻兼懷儀真

北觀憑欄望西橋信馬行朋從有名勝風物正淒清亂
定人煙改春回草木榮遙憐舊游處壞壁暗題名

聞余
梅園

題壁
尚存

久客憐之子寒牕幾晦明
羈禽戀鄉國來雁尚邊聲
事去雲成狗時來草化螢
未須論得失把酒謾忘情

和郡倅陳校書

模

祈雨韻

麥隴收黃槁秧田欠綠滋
三時猶好在一雨未為遲
精意能先物神明敢後期
邦人孚至意可但不能欺

和羅權丞

愚

至日雪韻

臺上五雲紀宮中一線添
巧開三白瑞幻出六花鹽
宿麥猶期潤前山已見尖
應憐貴公子索句久巡簷

送張端袞攝簿建平

吏道貴更事君行非為貧勾稽戾初意疾痛繫斯民一日居須葺他年政若神放船秋水闊著眼看修鱗

戲呈南池同遊諸兄

方池帶南郭勝踐及西風多稼天連碧芳蓮水映紅漁歌來席上鳥影度屏中想見垂楊裏詩成又暮鐘

山行阻雪呈同游諸友

幽尋本無急聊以會友生塵中妨劇談故作林下行僕

夫問歸路夜聞風雪聲何妨小遲留妙理細重評

和前韻呈李果州

通傳

行樂非吾事朋從慰此生劇談忘夜永起立緩盃行黃
獨幽人供朱絃太古聲他年盛山集不假退之評

送張端衷主含山簿

計利無非利辭難枉作難驅車平路去高枕此心安縣
小勾稽易時危賦斂殫好裨千慮失可使百憂寬

寄寶應丘大夫

敬

制閫今元帥男邦舊大夫受成無弊事直上有夷塗赤
縣圖新入蒼生喘欲蕪底須勞戰士城築守淮隅

丁亥冬感懷寄趙章泉

蓄

三首

楚塞仍多事章泉開寄音由來使狙詐何意啟狼心國
勢時輕重江流自古今遙憐杜陵老對雪幾愁吟

報國知無術書空竟若何淮山雲慘淡鍾阜石嵯峨高
孝遺規在梁陳往鑒多癡憂徒爾爾遠浦聽漁歌

我屋方茅下君家閩楚交鹿門知得計燕幕未安巢澗

谷泉堪飲山田飯可抄應攜靈壽杖雪藥嗅梅梢

寄同年朱景淵通判八首

以二人同心其利斷金為韻

念昔從子游金陵佳麗地幕府盛賓僚東南稱兩尉子才清而通我拙世無二櫟社雖輪囷靈根同晚歲

默數金陵友在者猶四人糾曹今別乘法官駕朱輪子鍾已弗暨一念還酸辛况我病所纏漁樵寄此身輸子曳朱紱斑衣奉慈親

當時最少年雪林紫芝翁詩名三十年正復坐此窮落

日澹平湖宿草鳴寒蛩何時一樽酒往酌與子同

謂趙紫芝

汝淳

四海游夫子粹學洞古今聞善亟推輓常恐力不任時

危係長才白日已西沉拱木戰寒風淒其千載心

謂游默齋

九吉

茂苑子周子慷慨憂時危斯文黽董流炳炳日星垂言

深衆所驚用淺才不施穹窿山下笛懷人定誰其

謂周正字

南仲

滕子嗜古學萬卷作生計孤燈耿夜闌盜畏不敢晚至

寶世不售虛名竟何利尚想古城隅幽花開繞砌

謂滕賢良

歲

細柳真將軍勁氣可立懦向來拯時危功畧天下半屢

詔不肯起出處懸自斷十載山澤游萬念春冰渙何當

求識面介子同里閭

謂周馬
帥虎

古人重結交一諾輕千金嗟我與夫子論交歲月深一

別三十年兩鬢霜雪侵願言益自強鴈來時寄音

題王荊公半山圖

歸來心事平蹇驢踏秋風舉鞭問髯奴何如浣花翁道
旁幾高松風來自相語桃李今何之歲寒予與汝

喜延陵從事內還任

聞道古延邑歡迎舊尹歸鄰翁爭掃舍學子競牽衣
喜陳編在還欣俗物稀樽前重懷想葵日映清暉

題戴氏稼庵

小泊尋前約周行得偉觀乾坤開玉宇日月走金丸高

岸城池固平田井牧寬京塵障遊日從子稅征鞍

題茅山潑墨池慶雲庵

路轉幾山腰地尋雙海眼澗咽呂公泉橋橫蜀道棧主人去不歸山空春事晚何時具蔬筍開門延客飯

寄宜興趙大夫

與趙

二首

勝地古陽羨清才今長官能令三害遠坐使四民安

聞邑

境自公之來獄無重囚野無暴虎

勿謂時無幾

來書云去替只四月

仍防弊有端

做成循吏樣傳與世人看

去接鴛行侶猶憐鶴髮翁連翩致嘉實多旨薦清空

所惠

酒名往見孤成約酬知有樸忠金張渠爾耳相關自清風

聞浙右頗有託

后家占田者

苦雨遣興

老去身何有時危念苦深朝陽方借煖宿靄又成陰梁
楚安巢少闕河去鳥沉誰歌出塞曲慷慨百年心

答王虞卿邀遊山

墨池催勝遊虞卿枉真蹟我行浩無期君歸定何日非

憂年歲晚自嘆機會失空煩日卓午蔬飯滿香積

碧雲即事

唧唧秋蛩鳴耿耿秋夜長
簡編負初心枕簟怯新涼
朝曦入疎牖宿雲散前岡
歸與一葉舟浩歌聽滄浪

送黃竹礪

湘流不盡恨楚客賦離騷
世已殊於古君奚罕所遭
羈懷便酒聖野興挾詩豪
醉裏擡詩眼山空月色高

雲邊喜潘兄見訪

年衰病愈難學廢朋來少聞子剝啄聲慰我精廬悄高
談極今古遠識到微眇願君緘此言勿貽俗子誚

六言八句

題真州廣惠倉倉即故船塢居南樓及天寧寺
後中有大池塔影浸其中

浙浙風搖叢葦霏霏雨弄新晴坐對江南山色往來無
限離情塔影參差波面歌聲宛轉樓頭已負少年行樂
更輸衲子清幽

送陳內機棄官還

一官已判歸休五斗何須外求違已莫詢田父折腰免
見督郵身寄紅蓮綠幕夢餐翠栢丹霞歸去聊尋舊隱
功名盍付渠家

七言八句

代賦壽寧宗潜邸

聖學家傳自有師更羅英俊侍經帷治功尚論唐虞際
政體寧甘漢晉卑猥向梁園陪末坐敢憑堯歷記佳期

羞囊已辦詩千首，準擬年年薦壽卮。

和真州太守營屋新成之韻三首

長淮清晏久無虞，官舍人煙已復初。
共喜輿圖方日闢，詎應卒伍尚星居。
四營分創因遺址，百堵周圍列聚廬。
武備既嚴軍氣壯，豈專捍禦奠州閭。

東南列將謹防虞，尚記熙寧變法初。
一自邊兵渡江水，遂令卒伍雜民居。
炊煙不斷雲橫壘，清夜無譁月滿廬。
妙用獨推賢太守，征徭元不到鄉閭。

經始南風詠有虞落成候筦報秋初連薨盡撤編茅舊
萬竈重新列屋居千里只今成保障一屋誰復等遠廬
何人袖出如椽筆為寫豐功揭里閭

和淮漕八月十四夜月詩二首

清涼景界限塵紛玉宇從容靜夜分欲滿尚慳今夜月
乍舒還斂北山雲孤光翻動枝頭鵲餘暈潛驅草際蚊
好處欲言人不解湛然天宇印心君

長淮百穀慶西成萬里何妨共此晴霖雨尚關天下望

月華猶幸晚來明要看玉宇清光滿聞道銀河此去平
邂逅西風輕借力夜深桂影更敷榮

中秋月有雲翳再用韻

孤城急鼓轉嚴更步屨中庭午夜晴人世昏昏同夢寐
使星耿耿伴清明雲開霄漢光華遠望極關河眼界平
想見登臨無限意此身那復計浮榮

儀真和同官韻二首

先生文采似班揚俗子何能較短長顧我未知金鑒否

期君聊復善刀藏壯懷欲寫須更僕勝日能來對舉觴
青紫不須分失得舊游多少因槐黃

簿書塵裏見清揚握手論心味更長何日山林共歸去
故園花竹可遊藏顏徒自樂一瓢飲漢殿爭陪萬壽觴
馬革裹屍成底事要須高卧到羲皇

北固山望揚州懷古

北固城高萬象秋煙竿一縷認揚州試乘綠漲三篙水
要見朱簾十里樓淚濕宮衣朝霧重愁薰寒草夕陽浮

隋堤舊事無人問
兩兩垂楊繫客舟

懷林維國二首

予學宦金陵得三山林維國邵武任伯厚吳門朱景
淵婺源葉潛仲為之友相得甚歡維國知我愛我視
他友為甚惟恐予有過差一夕四人相會於潛仲廨
舍抵足達旦始各自誦所短而誦人所長終也自言
其長而誦人之短遞相規益其友愛如許維國去金
陵未二年終於永嘉予亦離羣索居無復朋友之益

辛酉十月初五夜忽夢與維國遇如平生歡覺而悽然成二詩

四海論交二十年知心一見似前緣情親尚記通宵語
忠告難忘送別篇夢入蓬壺重會面座看書史尚堆前
應憐廢學從農圃要使留心在簡編

尚記升堂拜母時滿前兒女競牽衣鳳雛想見今成立
鴈序遙聞已奮飛

維國弟成己
已發浙漕解

身後聲名終不朽家傳

詩禮足相輝傷心白下金陵道無復班荆話昨非

送友人赴省試

月滿千門夜未央
憶陪多士湊文場
露將寒透銀袍冷
興與秋來筆力剛
十載轉頭成昨夢
一身為客尚他鄉
為言桂苑聯鑣客
要折高枝壓衆芳

送趙子野歸

秦淮契闊幾經春
釣月臨風入夢頻
萬竈無譁新號令
一樽相屬舊慇懃
綠波南浦予回棹
落日孤城子問津
聚散雲萍渾若此
臨分一笑大江濱

送恭叔兄赴省二首

秋薦吳江北鴈來幾看文陣奪標回
鵲飛鵲喜情何限
龍化鵬搏北有開禮部定知當一得
大廷端可壓羣才
春秋正學非阿世莫作公孫愧草萊

晞驥長慙馬不前著鞭何意在君先
須懲牛後羞餘子
獨占鰲頭下九天
上苑未須誇得意
道山共擬便登仙
雖然富貴浮雲等要使功名在簡編

過蘭亭

茂林修竹翠參天一水西來尚折旋
欲泛羽觴追往事
悵無嘉客繼前賢
短章回寄二三友
勝踐堪尋八百年
笑拂蒼崖題姓字
為言曾此掬流泉

喜王節夫過訪

我方卅角子勝冠
我老君猶鬢未斑
可但孤生多疾疢
也輸華館富清閒
交情敢忘鶯求友
野性終便鹿在山
何日歸歟同里社
杖藜來往翠微間

用韻寄陳仲思聞有詩它贈而不見及

之子才宜獬豸冠我纔童卯即窺斑
溟鵬已擊三千里
天驥猶遺十二閑
五字飽聞傳有位
尺書枉用到窮山
春風得句能相寄
待我猶存季孟間

再用韻戲答陳仲思

一讀新詩一解顏
天孫機杼錦爛斑
致師自昔能無語
瞥眼君宜付等閑
風定波濤收萬壑
雲歸紫翠出千山
論交早歲今華髮
少有猜疑愧兩間

賀陳子揚致仕追贈父母二首

一念平生在報親九原今日喜追榮鼎來天上維新渥
足慰人間罔極情康樂弟兄傳絕唱胡威父子擅清名
君家盛事人難及倦客聞風亦眼明

一笑相逢意自親別來庭樹幾枯榮流傳郢客陽春句
想見鴟夷萬里情賈傅才能通國體柳州文字占時名
何如一棹洮湖去獨泛滄波弄月明

代李居士謁王去非制幹三首

家山目斷古幽州百口來歸路阻脩丁字無端輕介冑

蟬冠却羨出兜鍪簀裘思墜先人業顧石誰為客子謀
不惜飢寒同一死南來恐作北人羞

僑居無地寄生涯布襪青鞋著露家太乙虛舟想蓮葉
玄都活計問桃花不堪衆稚貧為累坐使孤生髮半華
儻許侏儒均賦粟不妨老子自餐霞

一來寒谷轉春風百萬喁喁說此翁坐見西州成俗阜
忍令北客尚途窮籌邊聞道無遺策幕府流傳已上功
便有細書催入覲早回生意一言中

寄潘子善上舍

時舉

陳少陽率太學生伏闕上書六賊遂退天下快之少
陽猶以後書論李邦彥白時中等言不用拂衣去近
傳太學伏闕書是歟非歟非山間林下所得知獨怪
朝廷不用其言諸君猶苟安於學豈以靖康時事視
今日緩急異耶為賦五十六字質之同志者

少陽一疏折羣姦拂袖歸來日月間誤國小人

書中語

猶

法從叩閤諸子自賢闕是非頗亦通千古義利那能立兩間

若向西湖浮畫舫好傾卮酒酌孤山

送邵監酒兼東儀真趙法曹呈潘使君二首

儀真來往幾經秋風物淮南第一州山勢北來開壯觀
大江東下峙危樓沙頭縹緲千家市鱸尾連翩萬斛舟
去去煩君問耆老幾人猶得守林丘

十萬流離仰二天淮民只說使君賢向來積貯知無有
此去規模要有傳幼學可能傳權酤遠猷無惜助籌邊
公餘更向髯參問今賦梅花第幾篇

懷徐表兄

一笑相逢句曲天，別來十五換流年。
忍思渭上瓊瑰詠，

無復通泉寶劍篇。

時余尉江寧先君猶無恙

北渚春回芳樹合，西山

日暮碧雲連。鴈來數寄平安信，無限相思若箇邊。

偶題雲邊

桃花山下水流長，花不長開水自香。
此地正須招隱士，山菴聊復對崇岡。
屏幃繚繞竹千箇，旌纛森嚴栢兩行。
士會不生今已矣，不妨閒處且徜徉。

送友人

年來去客半西東，須信勞生等轉蓬。
萬里相望成別恨，一聲何處遞冥鴻。
人情對景分憂樂，月色於今豈異同。
莫把壯懷成索寞，盍聊與吸清風。

毗陵邂逅京口同舍湯叔厚

雞犬相聞里社同，琴書曾共客儒宮。
南樓夜醉三更月，北固秋吟萬里風。
去魯羨君勤采藻，游吳愧我尚飄蓬。
相逢便與論心曲，莫笑依然舊阿蒙。

和張寺丞謝惠河鮪韻二首

先生盛德信先亨
微物將誠愧晚生
春岸正當餘雨過
寒江尚想小舟橫
一奩走送慙遲暮
兩舍相望欠割烹
未必甘芹解知味
王公當諒野人情

鼎來佳句仰謙亨
春入池塘草正生
清夜擬陪簷雨酌
暮天應對碧雲橫
逍遙莊叟一枝穩
富貴齊人五鼎烹
戟衛肅迎揮手去
蘓州應愧此時情

和傅侍郎鹿鳴宴韻二首

向來北固萃羣英可但江山擅美名秀氣中間空畚築
斯文今日遇權衡歌成白雪傳新唱帆飽西風趣去程
會體使君珍重意不專車馬羨桓榮

先生議論在延英早歲金甌已覆名自古正人羞枉尺
祇今公論有持衡九重聞道將飛詔一水何妨緩作程
莫笑田家去天遠春來野草亦敷榮

和湯叔永二首

魯人豈解識東丘夫子猶懷去魯憂公論世間誰了了

德人心事本休休致身官路雖非遠回首家山盍少留
三徑未荒松菊在天涯多少望鄉愁

底須彈鋏嘆無家自有詩人賦子嗟平世豈應遺燭武
暮年安可傅長沙為隣幸賜千金諾進德相期一簣加
欲泛五湖觀浩渺興來還可共浮槎

送姜君玉赴省試

樽酒論文弱冠前交情老去只依然久荒三徑無來客
細撥青燈話昔年少日功名誰汗簡舊遊江海半華顛

君行試問都門柳幾送銀袍上九天

送彥與孫兄赴廷對

捷書夜到古朱方之子登名甲乙行偉行向來高月旦

謂辭學職

遺經端合破天荒

前此未有春秋登科

公孫對策風雲會董

子留名日月光趨向一分燕越異贈言惟有用心剛

夢使高麗到東海口占

夢魂飛到碧霄東日出扶桑萬丈紅窓戶矐矐開曉色
園林淡蕩已春風時平正使車書混天遠那能玉帛通

萬事悠悠均夢爾一樽聊與故人同

代東答合肥蘓刑曹兼呈淮西帥同年趙寶謨

仲夫

二首

青衫擬掾襲芳塵短褐歸來理釣緡二紀期君紹先烈
一官投老祇參軍宦情自與秋光薄公論猶期歲晚伸
見說宗工好風鑒薦書何日到嚴宸

聞道中原百戰餘遺民億萬企來蘓浪言恢復真疎矣
絕意懷來亦可乎北望淒涼悲故土南來調劑待新符

祇今淝水山川改寄語元戎盍遠圖

送友人

凜凜霜臺起事功脩脩三徑任窮通幾因節物傷離別
無奈行藏苦異同白露感懷悲杜老黃樓得句憶坡翁
鴈行何日齊飛去岼嶺相看酒一中

東施上舍

萬里秋光酒一鍾別來木末幾西風懷人衮衮東流水
問訊冥冥北去鴻愧我形容難似舊喜君意氣尚摩空

相逢莫怪深相問一笑猶疑是夢中

代譚與可謝石大夫鄉飲酒

大夫舉酒屬青衿八十衰翁亦許臨要向席間明厚意
敢辭酒半效狂吟持身勿使虧名義學古還須探聖心
元日習鄉君解否須知齒髮易駸駸

勉王甥

莘野淒涼渭水遥事功無復在漁樵但令一第先餘子
自可清名動聖朝禁路家聲猶赫奕詞場筆勢已嫖姚

夜牕燈火秋來好莫歎辛勤髀肉消

送鍾元達赴餘杭

知音十九在巖廊姓字高懸日月旁
視草祗今虛省署種花聊復向河陽
困窮已甚情當察富貴徐來味更長
梵宇仙宮最佳處詩成數寄水雲鄉

送王去非入餉幕

春歸花藥尚紅酣送子脂車馬在驂
幕畫向來多實用事機今可付常談
學方用力須千百事或當仁勿二三

別後欲知漁釣處五湖天水共澄涵

雨後口占呈陳校書

下田已漫高田槁太守來遲歸苦早忽傳亞倅府中來
太守停驂尚精禱前日應禱五日期今朝好雨隨車歸
遲速有期君解否太守束裝留不久

送石令君

攀轅父老雜兒童十載重欣見此風可但三年方論定
亦由去日與初同一塵不染冰常瑩萬折難回水必東

正直自應神所介人心况有是非公

和羅權丞愚尊經閣元旦觀雪

億萬飢民久籲天天開上瑞豈徒然深潭龜拆寒莎底
淺土蝗遺宿麥邊厲氣已消除日後祥雲飛墮曉風前
醉吟樓上瀛洲客為記三登第一年

送衛汝積歸句曲

汝積歸路過獨樓岡入亭子谷二處相去里許岡下
瞰數百里丘陵川澤若錯綉然谷中盤紆峭險下有

流泉疑有幽人勝士嘗建樓岡上以極臨眺著亭谷
中以貯幽勝以其亭多而樓獨故相承曰獨樓柳子
厚所謂游之道二曠如也與如也此蓋兩得之歲久
樓傾亭廢而名尚傳若鐵壚步然山居皆樵蘇之人
無能解其義者遂意獨樓為髑髏而以谷為孔是又
與小姑嫁彭郎同義吁可歎也因汝積路出其間為
辨證以刷是岡之恥

樓岡亭谷萬山西縹緲炊煙出翠微歸路正當清晝永

離懷莫悵白雲飛學醫要使人無費問道須知昨已非
好向庭闈商略此短章中或有玄機

送杜尉

範

秩滿還天台

眼看時事廢因循官路三年子獨勤袖有新詩頻教我
邑無長策可留君向來過計憂周隕此去何時靜楚氛
未必詩書盡虛語勉哉行矣張吾軍

送羅季能還延陵鎮

眼底紛紛利欲昏君心當與哲人論俗塵不染脩藍露

世味逾輕太古尊
暮月此來當歲儉
寒冬何地不春溫
幡然不憚延陵去
季子清風百世存

謝朱仲玉二首

君家只隔小橋西
幾度占星望少微
已向龍墀攄大對
不應鸞翼尚低飛

朱以特科為簿

杖藜喜逐先生後
斂板誰知

故我非欲學丘江
吟短句錦文試覓景陽機

夫子知名浙水西
妙年興學洞幾微
一官簿領身如寄
萬里雲霄步若飛
詩苦何妨同杜老
說難終不羨韓非

擬酬白雪陽春句願借天孫織女機

仲玉和前詩見贈因再用韻

官倉出粟徧東西多謝朱公念隱微但覺閭閻猶菜色
不知園囿已花飛當年國論無同異此日民言有是非
天上駕鴻方刷羽海邊鷗鷺已忘機

謝湯生惠酒和來韻

聞道吾猶及老成高秋離索不勝情朋絨已喜賢從事
二缶那堪對麴生多病吾今同退鷁壯懷君可掣長鯨

能來共醉西風否木落千山夕照明

奉酬友人登多景樓見懷

雲橫不斷古神州縹緲河山總戍樓此地幾經人北顧
長江不住水東流兵戈幾處能安枕稻蟹三吳正得秋
人事天時多錯忤一盃聊復潤吟喉

代書答龔楚州

維蕃

使君問政及郊扉病叟何能措一辭積粟龜生真至計
屯田充國亦良規將權可與他人共德意須令舊壤知

聞說鹽城有真令相逢為說每相思

漫塘晚望

霽色催雲作晚霞小橋却立岸烏紗
雨餘菱芡新抽葉秋早菰蒲未著花
燈影微茫行客艇鐘聲縹緲梵王家
沉吟索句輸公等我欲臨流理釣槎

寄陸大夫

寄語金淵陸大夫歸田相府竟何如
提兵劫取已非矣縱火燒殘豈義歟
百口喪身端自爾千錢酬直殆欺余

放翁舊隱佳山水賸好歸歟理故書

送鍾元達倅濠

喜見弦歌近帝京又分風月向邊城時方急士國家計
事不辭難臣子情塞下規模龜御史湟中勲業趙營平
君行試與重商略烏鵲南來數寄聲

送平江趙法曹

金科天上耿星辰丹筆年來有屈伸子去平反供母笑
民知寬大頌君仁祇今茂苑題輿客曾是瓊林合席人

若問殘生煩寄語扁舟長占五湖春

送黃子弘歸吳門

亡友周君南仲嘗為余道其里中黃子弘之賢又為
子弘道賤名南仲沒且三年子弘始來訪予於漫塘
感令悼昔欣慨交心其行也賦五十六字且徵後會
玉樓工就故人仙宿草離離起暮煙曾說項斯誰復記
尚懷中散子真賢鼎來窮巷方今日勝讀殘編已十年
西望猶能話離索秋風來共釣魚船

代邑士上趙百里

善鄧

趙大夫十月甲子試補縣學諸生與潘少府謀以科
詔在近倍增員以來承學明日乙丑市民將奉淫
祀鼓惑羣聽復檄少府榜笞其人毀其像而置諸河
夫教莫先於養士化莫大於明民而二日之間善政
兼舉可與文翁興學韓愈闢邪儼美匹休某等忝與
諸生謹成小詩以謝

美矣吾邦此大夫仁中有勇信令無治倖東里興鄉校

政壓西門送女巫謀廣生員來共學力排淫祀警羣愚
一陶風俗成醇厚千古聲名泰華俱

社日僧舍風雨

借蔬香積共晨炊客裏良辰總不知孺子從渠均胙肉
南翁無處聽巴詞神鴉得志飽終日巢燕有心來及時
風雨聒人聾轉甚半鍾濁酒可能治平聲

寄題戴氏別墅

聞君築室水雲鄉一榻脩然獨老龐近挹荷香供几案

遠邀山翠入軒窗自歌自笑遊魚樂時去時來白鳥雙
何日過門成夜泊一樽相與對銀缸

和趙龍圖鹿鳴宴韻二首

勸駕丁寧自漢興禮行郡國玉鏘鳴使君珍重新開宴
多士連翩喜策名月窟一枝傳好信風帆千里送脩程
主賓後會君知否紫橐青袍對寵榮

預宴當年記夙興笙歌堂上正和鳴別來幾送龍門客
去後空題雁塔名麋鹿羣中便野性蜩鳩飛處笑雲程

羞有也到茅簷下磊塊堆盤里社禁

和趙章泉見寄二首

先生人物眇應劉千載詩亡獨泝流五字還堪薦郊廟
一官何事老林丘章泉樂處知何似南澗良朋亦健不
欲拜龐公何日是夢隨飛鶴過山頭

一作午窗無語獨接頭

平生暗裏識曹劉眼底誰為第一流錦里正應推老杜
魯人亦解說東丘騎驢頗忘推敲否上馬還能矍鑠不
此去相思君會取蒟黃梅藥上枝頭

用韻煩蔣延陵寄前詩至章泉

之子交游柳與劉，
竭來聲聞水東流。
懸知此去居三館，
可但當年記九丘。
滄海狎鷗猶好在，
紅塵沒馬肯回不。
短篇為寄章泉老，
莫聽浮沉付石頭。

謝章泉再以前韻見寄三首

白社相從遠與劉，
可憐衲子溷儒流。
自嗟達巷知夫子，
緬想諸荀從太丘。
書寄洪喬空爾耳，
詩編杜集可容不。
前山底處堪長望，
我欲携筇上上頭。

解印歸來白社劉風流靖節許同流詩來幾說鶯求友
老去自慙狐首丘會合由來天幸耳殷勤還識我心不
春回是處堪行樂能復携錢掛杖頭

書賢從事我非劉傑句君爭萬壑流擬學參參酬杜甫
可能列子識壺丘倦游審已懸車矣問字猶多載酒不
無限相思梅發處手推殘雪嗅枝頭

和邑大夫勸駕韻

自笑當年躍冶金老來文物見彬彬登名已喜多三邑

擢秀懸知敵萬人
晴日琴堂開宴好
春風瓊苑拜恩新
惟餘卧病江湖客
坐看聯翩對玉宸

送張端衡尉句容二首

梅仙西上古仙鄉
梅蘂先春特地香
自是邾人聞魯柝
懸知晉盜避秦疆
名山久合清蕪穢
窮巷猶聞缺蓋藏
惠政由來要全美
須君努力佐琴堂

去鄉喜見似鄉人
君去家山祇比鄰
令長垂髫同里社
交承握手記城闌
絃歌堂上寧忘舊
樽俎筵中必告新

若也從容問無恙為言魚鳥已情親

送王去非服除造朝

疾風吹雨洗塵寰北渚津頭水沒灘
千里送君黃鵠舉一生笑我白鷗閒
清名已至雲霄上逸氣還充宇宙間
此去西湖重回首淡煙疎柳認孤山

送張晉望倅湖州

風月平分古治中掛帆直指水晶宮
祗今第宅多親貴自昔閭閻有阨窮
勿用彌縫乖直道毋煩歌舞競新功

舉頭見日長安近詔入元非藉子公

代東寄張端衡

句曲山頭白鶴飛遙憐絲棒正宣威仙家有喜迎仙吏
客路無塵點客衣月澹郊原從犬卧秋高籬落任雞肥
子真東野齊名在莫向西風苦念歸

為布金寺僧慧鑑作呈趙守

善湘

老樹槎牙記佛廬露啼蛩弔百年餘鼎新堂殿誰為此
壯觀林泉我弗如身上無華惟布縷盃中舐味祇山蔬

野僧勤瘁能如許罪或無多乞赦除

送高桂陽

不倚

之任二首

清才寧合駕緹車天上新分竹使符此去專城重摩撫
向來涉筆幾嗟吁南州想見歌何暮北府猶聞戒疾驅
更恐掖垣須敏手未應千騎出重湖

一笑相逢此道同別來木末幾青紅自憐老去北牕下
猶得身棲廣廈中良夜擬乘千里月神山竟隔一帆風
贈行更愧留行者遮道歌翻別駕功

和趙章泉寄詩韻

來詩有常爾孤高仰廬阜忽焉並命出容臺之句自
揣何敢當此謹次韻以謝

索居靈瑣久塵埃一讀新篇病眼開妄意嚴詩編杜集
敢陪郭隗上燕臺紆朱晚歲徒云爾養素平生壯矣哉
更許韓非書傳尾遺榮何止被雲來

次姜君玉韻且賀北固新居

車來流水馬如龍北上精藍西復東雅意只貪山在近

高標誰與子相同門開正好來三益文就何妨送五窮
擬向巖前分半席可能闢地著隣翁

門外青山跨伏龍山頭未曉日生東竹林已喜王戎近
蓮社還堪惠遠同盛事正應符地勝清才豈必坐詩窮
欲成善頌陪張老自笑尊前一秃翁

送張端袞赴潘葑

汲取人間第二泉釀成天上酌神仙渠儂得此良佳矣
我輩為之或未然職守近來成漫浪湖山佳處且回旋

向陽花木逢春易會取聲名動日邊

和柴監

之子通才不受拘妙年文史足三餘
司征關市方共二宴啟華堂正樂胥
錦帳笙歌香霧繞禪房風月夜牕虛
後生取舍能如此問信寧非遠器歟

學門肇開為諸兄賀

幾年黌宇傍城隈禮樂文章蔽草萊
達道一朝隨地闢宮牆數仞倚天開
舉頭日月清光近入眼湖山秀氣來

寄語鄉邦頭角士龍門此去會風雷

和尤伯華廣德使君怡亭對雨

之子胸中不外營軒亭水到自渠成詞章妙處窺騷雅
師友平生祇弟兄元凱一門兼衆美夷齊千古擅雙清
新詩有贈不知報衰拙如余盍負荆

軒亭閨爽喜新營燕雀應來賀履成樽酒兩忘賢與聖
韋編相對弟和兄詩如綉段從頭好人似冰壺徹底清
寄語金昆同石友

謂蔣魁

道逢何日許班荆

勉張兄立民作詩

脩然風骨一臞仙
誤走紅塵逐世緣
亦欲名同天壤壽
且須句與日星懸
後湖廢沼生春草
南郭遺墟起暮煙
聞道錦囊時有得
故山花鳥亦欣然

趣劉聖與

用行

寓王甫桂墅

門外平湖百頃寬
庭前翠竹繞欄干
鳥啼花笑四時好
几淨牕明六月寒
賸可琴書供晝永
不妨絃管到更闌
留行莫為歌楊柳
作計應須趣牡丹

送戴子家歸永嘉

楚

君住柵溪第幾山我家北渚水雲間
二十里遠來非易三五朝留勿作難
有子已知頭角異安心寧恤鬢毛斑
尺書頻寄問無恙共樂生前日月間

癸未寄王甥

別時庭戶正秋清劃見園林翠織成
吳下余思頻刮目渭陽子豈遂忘情
堤間飛蓋分垂柳水面浮舟約半萍
乘興時來共清話相望能隔幾牛鳴

贈尤丞季端

冠製殊常袖更寬風流王謝出長干
筆端雲錦呈天巧胸次冰壺挹露寒
未許歸期占信宿想應喜色動門闌
賢昆自有長生術為覓仙家九轉丹

讀張氏義莊畫一寄持甫輅院

湜

叔世誰憐族派同高情真有古人風
宗分大小稽周典惠匪親疎比范公
二項開端能不吝一編垂訓可無窮
欲書盛事傳千載預愧衰孱語不工

再韻謝張持甫過訪二首

甕牖篝燈一笑同地爐燒火愧家風論

平聲

財以義輕浮

俗論道歸儒識至公行異於時方易沮理趨於數要深
窮老來狂斐君無誚他石猶堪付玉工

道自周衰說異同眼明伊洛振遺風過人高行非難事
入聖微言本大公道在鬼神常共在術窮天地本無窮
三才並處君知否不爾何裨造化工

賀趙居父

若瑤

登第

詞場聞奪錦標歸好是斑衣映綠衣永日湖山供賞詠
好風宮殿正清微堂新六桂先宸翰庭秀雙芝煥彩闡
肯向長安誇得意妙年伯玉已知非

碧雲即事

塊坐經年不入山山僮拍手笑衰顏登高猶喜心期在
望遠還驚目力慳雲氣蒼茫自羈旅煙波飄蕩幾惛鯨
朝來舊雨添新雨誰識安危指顧間

秋闈後勉子姪

我生場屋慣周旋得失從知豈偶然
天理先須盡人事
時文端的本廛編日烘甕牖朝先起
雪壓茅齋夜不眠
萬里夷塗從此去著鞭寧怕祖生先

寄范黃中

炎運管

鐵甕城中十萬家
哀絃促管競繁華
晝長獨有楊雄宅
天遠空浮博望槎
讀罷離騷想芳草
吟成梁父對菱花
客來莫問行藏事
且共盧仝七椀茶

奉送諸兄謁府

男邦養士擬侯邦師帥寧分彼一方明辨正須煩幕府
作成庶不異州庠紫金山迥連三島甘露樓高俯八荒
六代豪華猶在目停撓毋惜小徜徉

甲午至節後同諸兄入市歸有感

七十衰翁入市歸感今懷昔淚沾衣人稀舊識居猶是
俗競新華質已非九府泉慳誰改作五材兵去孰防微
西山不屬銀緋客只合高歌詠采薇

贈陳內機

學詩常擬邵堯夫問道曾謁楊慈湖堯夫之詩呈大樸
慈湖之學澄太虛羨君優游兩者間傲視軒冕如蘧廬
何時從我山中居絕勝泛綠依紅渠

送友人入京

郭內無田負郭居酒中有趣酒尊疎波間屢聽濯纓曲
架上時繙種樹書萬里長風摧岸柳一天清露屬園蔬
故人欲問平安信為說年來頗晏如

雜言

開禧紀事二首

泥滑滑僕姑姑喚晴喚雨無時無曉窓未曙聞啼呼更
勸沽酒提壺蘆年來貴無酒沽

婆餅焦車載板餅焦有味婆可食有板盈車死不晚君
不見比來翁姥盡飢死狐狸嘬骨烏啄眼



漫塘集卷二